

• 11. SARAJEVSKI SALON •

→ POZIV ZA UČEŠĆE

Poštovani,

Udruženje likovnih umjetnika Kantona Sarajevo (ULUKS) ima zadovoljstvo da Vam se obrati ovim putem i pozove Vas da se prijavite za učešće na kolektivnoj selektivnoj izložbi "11. SARAJEVSKI SALON", koja će biti realizovana u galeriji Collegium artisticum u prvoj polovini 2023. godine.

Udruženje likovnih umjetnika Kantona Sarajevo okuplja eminentne likovne umjetnike svih generacija koji su rođeni ili žive i rade na teritoriji Grada Sarajeva, Kantona Sarajevo i Bosne i Hercegovine. Izložbena aktivnost s tradicijom još iz šezdesetih godina kada je održana prva izložba pod nazivom "Sarajevski salon", a inicijativa za pokretanje tog izložbenog projekta i događaja potekla je od istaknutih tadašnjih mladih umjetnika Borislava Aleksića, Mehmeda Zaimovića, Mersada Berbera i likovnog kritičara Muhameda Karamehmedovića s ciljem afirmacije kulture i predstavljanja aktualnih kretanja na bosanskohercegovačkoj likovnoj sceni. Koncept "Sarajevskog salona" je prezentacija recentnih tendencija u području likovnosti, s insistiranjem na kvaliteti, do koje se dolazi selektivnijim pristupom. Prezentiraju se djela renomiranih, najznačajnijih bosanskohercegovačkih umjetnika i umjetnica različitih generacija. Afirmacija i potvrda kvaliteta je upravo jedan od ciljeva "obnovljene" izložbe "Sarajevski salon" koju organizuje Udruženje likovnih umjetnika Kantona Sarajevo posljednjih jedanaest godina.

Nakon više od četiri decenije, 2011. godine, tada novoosnovano Udruženje likovnih umjetnika Kantona Sarajevo, na čelu s umjetnicima Mustafom Skopljakom, Radoslavom Tadićem, Izetom Alečkovićem, Džekom Hodžićem i Hamzalijom Muhićem, smjelo kreće u organizaciju kolektivne selektivne izložbe istog naziva. Zahvaljujući entuzijazmu i energiji osnivača i voditelja Udruženja, kao i zalaganju umjetnika i umjetnica okupljenih oko pomenutog Udruženja, te svakako zahvaljujući finansijskoj podršci Ministarstva kulture i sporta KS, "obnovljena" izložba "Sarajevski salon" se opet realizuje, s ciljem da pruži relevantan uvid u aktuelno stvaralaštvo i umjetničku produkciju bosanskohercegovačkih umjetnika i umjetnica.

PROPOZICIJE UČEŠĆA:

- Pravo prijave za učešće na izložbi imaju autori koji su rođeni ili žive i rade na teritoriji Grada Sarajeva, Kantona Sarajevo i Bosne i Hercegovine
- Autori mogu konkurisati sa najviše dva (2) rada koja su nastala tokom posljednje dvije godine (2020. – 2022.)
- Autori mogu konkurisati sa radovima iz svih oblasti vizuelne umjetnosti (slikarstvo, kiparstvo, grafika, fotografija, video, novi mediji, performans, ostali vidovi likovnog izražavanja)
- Autori koji konkurišu za učešće na izložbi su obavezni putem e-maila dostaviti popunjen prijavni obrazac i prateću dokumentaciju, do naznačenog roka
- Izbor radova (selekciju) za izložbu vrši Umjetnički savjet ULUKS-a koji će koncipirati izložbu na osnovu selektovanih radova
- Autori koji prođu selekciju Umjetničkog savjeta biće blagovremeno informisani o slanju i rokovima dostavljanja originalnih radova koji će biti predstavljeni na izložbi.

SADRŽAJ PRIJAVE:

- Popunjen obrazac koji treba da sadrži: osnovne informacije o autoru i podatke o umjetničkom radu (naziv, godina nastanka, tehnika, dimenzije); obrazložen koncept i opis rada; tehničku specifikaciju i opis tehničkih potreba i opreme koja je potrebna za postavku rada u prostoru
- Biografija/CV/portfolio
- Autorski rad: reprodukciju /fotografiju ili skicu/ rada koji se prijavljuje poslati u JPG formatu rezolucije 300dpi ili u nekom od video formata. Ukoliko je file (reprodukcija/prezentacija rada) veći od 20MB izvršiti upload na **youtube.com** video platformu ili na *data platformu **wetransfer.com** i poslati link.

ROK ZA PRIJAVU:

Zainteresovani autori mogu dostaviti prijavu za učešće od 11. novembra zaključno do 16. decembra 2022. godine putem e-maila na: info@uluks.ba
Prijave pristigle nakon navedenog roka neće biti uzete u razmatranje.

Poziv za učešće na kolektivnoj selektivnoj izložbi "11. SARAJEVSKI SALON", propozicije i prijavni obrazac za učešće mogu se pronaći i preuzeti na web stranici i facebook stranici ULUKS-a.